



**HORATII TVRSELLINI || ROMANI || E SOCIETATE IESV ||
LAVRETANAЕ HISTORIAE || LIBRI QVINQVE. ||**

Torsellini, Orazio

Romae, 1597

Cap. 6. Caelati operis, quo sacra ædes conuerstitur, descriptio.

[urn:nbn:de:hbz:466:1-64112](#)

*Cælati operis, quo sacrosancta Ædes vndique
vestitur, descriptio.*

Cap. VI.

Eodem tempore Lauretanæ Domus cultus, & propagatus foris, & amplificatus domi. Paulus Pont. celeberrimum illud Pontificalis magnificentiæ monumentum ab Iulio destinatum, inchoatum à Leone, effectum à Clemente, ipse non quidem omni ex parte perfectum (de erant quippe statuarum pleræque, & æneæ valuæ omnes) sed tamen eo perductum, ut absolutum videri posset, aperuit anno huius seculi XXXVIII. opus enim uero egregiū ac mirabile, cui noua hæc operum magnificentia quicquā adhuc in pari mole adæquare non potuit. Satis constat ex rationum libris, in id opus XXII. aureorum millia insumpta, exceptis viginti statuis egregie factis, & valuis æneis quatuor pulcherrime cælatis, quæ pene tantidem stetere. Quadratum est ornamentum sacram vndique Virginis cellam amplectens: totum ferme e candido marmore solido, ac mira arte cælato. Patet in longitudinem pedes ferme quinquaginta, in latitudinem circiter triginta: altitudo latitudini ferme par. Vniuersum opus e Carrariensi marmore candoris eximij constat, striatis opere Corinthio distinctum columnis, quarum senæ longiora latera adornant, quaternæ breuiora. Imam partem fascia pedalis e marmore Luculleo cingit, stereobatæ locum obtinens. Surgunt inde stylobatæ coronati, qui apte spatia distinguunt. In spatijs stylobatisque, vel gentilia, adscitaue Leonis Pontificis insignia, vel virtutum argumenta cælata visuntur, sigillis, qua pedalibus, qua cubitalibus mire scite, venustaque factis. Supra stylobatas columnæ dispositæ binæ ad singulos angulos: in longioribus autem lateribus etiam binæ

binæ in medio, binis videlicet ianuis æquo spatio interie
ctæ. In ipsis porro intercolumnijs bini item signorum suis
loculamentis inclusorum ordines deinde adiecti: vnuis in
ferne ad bases, sacrorum Vatum: alter superne ad epistylia
Sibyllarum Christi, aut Deiparæ Virginis ortum vatici-
nantum. Ipsa loculamenta porphyreticis tabulis incru-
stata, opere magnifico. In maioribus spatijs inter colum-
narum scapos, tabulæ ingentes è candido marmore solido
integroque vbi nobilium B. Mariæ factorum argumenta,
simulacris naturalis fere staturæ eminentibus, pulcherri-
me cælata miraculo sunt. Epistylia porro columnarum
egregie facta opere Corinthio multiplex corona cingit,
cui subiecta spatia binæ aquilæ tenentes mordicus encar-
pos restesque pomorum, ac fructuum egregie cælatae, inter
iectis leonum rostris, adornant. In summo denique pul-
cherimus columellarum ordo coronatus, angelorumque
eminenter figuris concinne venusteque distinctus, qui
vniuersum opus circumiens pro coronide est: ambulatio-
nemque vndique per uiam præbet, ad suspendenda voti-
ua vexilla, quæ subinde B. Virgini afferri solent. Pluri-
bus describere pretium operæ nō duco, cū spectare liceat.
Opus omnino visendum, cuius eximiam pulchritudinem
nemo concipere animo potest, qui non oculis ante subie-
cerit. Ergo ut apertum sacrosanctæ cellæ ornamentum
longe pulcherrimum fama vulgauit, confessim maximi
Lauretum fieri accolarum, peregrinorumque conuersus.
Quippe artifices de industria illius ædificij fabricam-
quoad perfectum esset opus, velis obductis quam maxi-
me occultauerant, ut magnificentius deinde spectaretur,
cum absoluti operis pulchritudo recens, atque integra ad
mortalium oculos perueniret. Itaque insatiabili illa spe-
cie, & ad rationem, solertiamque præstantissima, cun-
cti auide oculos, animosque pascebant suos.

Tem-